

欽定天文正義卷八十

霧占考

蒙霧占考附

露占考

霜占考

冰占考



霧占考

陳後主禎明三年正月朔旦雲霧晦暝入鼻酸辛  
東魏武定四年冬大霧六日晝夜不解

唐武后長壽元年九月戊戌黃霧四塞霧者百邪之

氣為陰冒陽本於地而應於天黃為土土為中宮

中宗神龍二年三月乙巳黃霧四塞景龍二年八

月甲戌黃霧昏濁不雨三年正月丁卯黃霧四

塞十一月甲寅日入後昏霧四塞經二日乃止占

曰霧連日不解其國昏亂



明皇開元五年正月戊辰昏霧四塞 天寶十四年  
冬三月常霧昏暗十步外不見人是謂晝昏占曰  
有破國

肅宗至德二年四月賊將武令珣圍南陽白霧四塞  
上元元年閏四月大霧占曰兵起

德宗貞元十年三月乙亥黃霧四塞日無光

懿宗咸通九年十一月龐勛圍徐州甲辰大霧昏塞

至於丙午

僖宗乾符六年秋多雲霧晦冥日旦及禺中乃解

光啟元年秋河東大雲霧

昭宗景福二年夏連陰四十餘日霧 光化四年冬

昭宗在東內武德門煙霧四塞門外日色皎然

宋欽宗靖康二年正月丁未霧氣四塞人對面不相

視

高宗建炎元年十一月甲子北京大霧四塞 三年

三月上發溫州航海乙丑御舟次松門海中白霧

晝晦 紹興八年三月甲寅晝晦日無光陰霧四

塞



寧宗慶元三年二月丁卯晝晦昏霧四塞

蒙占考

宋高宗紹興八年三月乙卯晝蒙京房易傳曰霧上下合也蒙如塵四月積雨方止

孝宗乾道五年正月甲申晝蒙 淳熙六年十一月乙丑晝蒙十三年正月丁亥亦如之

寧宗慶元六年十二月辛卯晝蒙 嘉定三年正月丙午晝蒙 十年正月乙未晝蒙二月癸巳日蒙無光 十三年三月壬辰晝蒙

霾占考

宋仁宗嘉祐八年十一月丙午大風霾

英宗治平四年正月庚辰朔大風霾

神宗熙寧四年四月京師大風霾

高宗建炎元年三月丁酉汴京風霾日無光

孝宗乾道五年正月甲申晝霾四塞 淳熙五年四月丁丑塵霾晝晦日無光

寧宗嘉定十年正月乙未晝霾



露占考

漢宣帝甘露元年甘露降

光武建武十三年夏甘露降 中元元年郡國頻上

言甘露降

明帝永平十七年正月甘露降于甘陵

章帝建初四年甘露降泉陵洮陽二縣

安帝延光三年四月壬戌沛國言甘露降豐縣七月

馮翊言甘露降頻陽衙

桓帝延熹元年上郡言甘露降



魏高貴鄉公甘露元年正月鄴及上谷並言甘露降  
陳留王咸熙二年四月南深澤縣言甘露降

吳孫權黃武二年曲阿言甘露降 嘉禾五年武昌  
言甘露降於禮賓殿 赤烏二年零陵言甘露降

九年武昌言甘露降

孫皓甘露元年四月蔣陵言甘露降遂改元

陳宣帝太建七年甘露頻降樂游苑立甘露亭

後魏太武太延元年甘露降於殿內

唐高祖武德九年四月甘露降於中華殿之桐樹泣

如冰雪以示羣臣

德宗貞元十年正月西川奏當管甘露降松栢樹竹

藂等二千四百四十二處

宋太祖乾德四年二月長春節甘露降江陵府報恩  
院連十日靡微如烟霧清栢葉皆甘

太宗太平興國三年正月甘露降壽州解色如琥珀

徧覆庭檜 端拱二年二月甘露降壽州解園栢

及資聖寺檜狀若華藹色如凝脂

真宗咸平元年富順監有甘露降梅柳靡洒如珠



景德元年九月甘露降桂州永寧縣桐樹如稻米色白

神宗熙寧元年距元豐八年天下言甘露降凡二十餘處

哲宗元祐元年距元符三年甘露降凡二十餘處

徽宗建中靖國元年距宣和七年中外言甘露降多不可紀其尤著者大觀初降於九成宮帝鼎室三年冬降於尚書省及曹御製七言四韻詩賜執政以下其後內自禁中及宣和殿延福宮神霄宮下

三學開封府大理寺宰臣私第皆有之歲歲拜表稱賀



霜占考

春秋定公元年十月隕霜殺菽劉向以為周十月今  
八月也陰氣未至君位而殺誅罰不由君出在臣  
下之象

僖公二年十月隕霜不殺草為嗣君微失東事之象  
漢武帝元光四年四月隕霜殺草木先是二年遣五  
將軍二十萬眾伏馬邑下欲襲單于單于覺之而  
去自是始征伐四夷師出三十餘年天下戶口減  
半



元帝永光元年三月雨雪隕霜殺桑九月二日隕霜  
殺稼天下大饑時中書令石顯用事專權

王莽天鳳元年四月隕霜殺草木 地皇二年秋隕  
霜殺穀

吳孫權嘉禾三年九月朔隕霜傷穀按劉向說誅罰  
不由君出在臣下之象也時校事呂壹專作威福  
晉武帝泰始九年四月隕霜時賈充親黨比周用事  
咸寧三年八月平原安平上黨泰山四郡霜害  
三豆是月河間暴風冰寒郡國亦隕霜傷穀是後

征吳及討涼州賊六月汲郡廣平陳留滎陽雨雹  
隕霜傷秋麥千三百餘頃 太康元年三月河東  
高平霜雹傷桑麥 二年三月河東隕霜害桑  
六年三月齊郡臨淄等四縣樂安等八縣琅邪等  
八縣河間等六縣高陽等四縣隕霜傷桑麥 八  
年四月齊國天水二郡隕霜 九年四月隴西隕  
霜 十年四月郡國八隕霜

惠帝元康七年七月秦雍二州隕霜殺稼 九年四  
月河南滎陽潁川隕霜傷禾



明帝太寧三年三月癸巳隕霜

穆帝永和十一年四月霜

梁武帝天監三年三月六年三月並隕霜殺草京房  
易傳曰興兵妄誅謂亡法厥罰霜是時大發卒拒  
魏兵於鍾離連兵數歲 大同三年六月朐山隕  
霜

陳宣帝太建十年八月隕霜殺稻菽時大興師衆與  
周師相拒於呂梁

唐太宗貞觀元年秋霜殺稼京房易傳曰人君刑罰

妄行則天應之以隕霜 三年北邊霜殺稼

高宗永徽二年綏延等州霜殺稼 調露元年八月

邠慶寧涇原五州霜

武后證聖元年六月睦州隕霜殺草吳越地燠而盛

夏隕霜昔所未有 四年四月延州霜殺草四月

純陽用事象人君當布惠於天下而反隕霜是無  
陽也

明皇開元十二年八月潞綏等州霜殺稼 十五年  
天下州十七霜殺稼



憲宗元和二年七月邠寧等州霜殺稼 九年三月

丁卯隕霜殺桑 十四年四月淄青隕霜殺惡草  
及荆棘而不害嘉穀

敬宗寶歷元年八月邠州霜殺稼

文宗太和三年秋京畿奉先等八縣早霜殺稼

宣宗大中三年春隕霜殺桑

僖宗中和元年春霜秋河東早霜殺稼

宋太宗太平興國七年三月宣州霜雪害桑稼 淳  
化三年三月高州霜花木皆死

真宗景德四年七月渭州瓦亭塞早霜傷稼 大中

祥符九年十一月大名府澶州相州並霜害稼

仁宗至和二年河東自春隕霜殺桑

高宗紹興七年二月霜殺桑稼

孝宗淳熙十六年七月階成鳳西和四州霜殺稼

光宗紹熙三年九月丁未和州隕霜連三日殺稼是  
月淮西郡國稼皆肅於霜民大饑



水占考

春秋桓公十五年春亡冰劉向以為周春今冬也

成公元年二月無冰十六年正月雨木冰劉歆以

為上陽施不下通下陰施不上達故雨而木為之

冰零氣寒木不曲直也劉向以為冰者陰之盛而

水滯也木者少陽貴臣卿大夫之象也此人將有

害則陰氣脅木木先寒故得雨而冰也時叔孫喬

如出奔公子偃誅死

襄公二十八年春無冰說曰水旱之災寒暑之變天



下皆同故曰無冰天下異也

漢武帝元狩六年冬亡冰先是比年遣大將軍衛青霍去病攻祁連絕大幕窮追單于斬首數十萬級還大行慶賞遣博士褚大等六人持節巡行天下存賜鰥寡假予困乏舉遺逸獨行君子郡國有以便宜上者丞相御史以聞天下咸喜

昭帝始元二年冬亡冰是時上年九歲大將軍霍光秉政始行寬緩欲以說下

魏文帝黃初六年正月雨木冰是年利成郡兵蔡方

等殺太守徐質據郡反太守古之諸侯貴臣有害之應也一說以木冰為木介介者甲兵之象又帝自將舟師征吳成卒十餘萬連旌數百里臨江觀兵是其應也

晉元帝太興三年二月辛未雨木冰後二年周顗等遇害是陽施不下通也

穆帝永和八年正月乙巳雨木冰是年殷浩北伐明年軍敗十年廢黜

孝武帝太元十四年十二月乙巳雨木冰明年王恭



庾楷殷仲堪居外藩與王國寶等構怨終同夷滅  
東魏孝靜武定四年冬大雨木冰時司徒侯景專制  
河南神武薨景舉兵反慕容紹宗討平之

後齊後主天保元年雨水冰三日時清河王岳為高  
歸參所譖憂死 武平元年冬雨水冰明年二月  
又雨水冰時錄尚書事和士開專政琅邪王儼矯  
詔殺之儼尋遇害 六年七月雨水冰其年周師  
入晉陽

唐高宗麟德元年十二月甲戌雨水冰 儀鳳三年

十一月雨水冰

武后延載元年十月癸酉白霧木冰

中宗景龍四年三月雨水冰

明皇開元二十九年十一月雨水冰寒甚數日不解

天寶元年冬無冰先儒以為陰失節也

代宗永泰元年三月雨水冰 大歷二年十一月紛

霧如雪草木冰

德宗貞元元年十二月雨水冰 二十年冬雨水冰

穆宗長慶三年十一月雨水冰



敬宗寶歷元年十一月雨木冰

文宗太和七年十二月夜霧木冰 開成四年九月

雨雪木冰

武宗會昌元年十二月雨木冰 四年正月木冰

昭宗景福中滄州城塹中冰有文如畫大樹華葉芬  
敷者時人以為地當有兵難近華孽也

後晉開運二年正月東京封邱門外壕內冰上有文  
若大樹華芬敷之狀相連數十株宛如圖畫

漢高祖天福十二年十一月旦日天大昏霧木有冰

至十一日霜露著草木皆為冰

周太祖廣順三年十一月雨木冰

宋太宗淳化二年冬京師無冰

真宗咸平元年十一月庚戌雨木冰 景德元年二

月保順軍城壕冰隱起文為桃李華雜人物之狀

大中祥符二年京師冬溫無冰 五年正月戊

寅京師雨木冰 九年正月霸州渠冰有文如花

葩狀

仁宗慶歷三年十二月大雨雪木冰占曰兵象 嘉



祐六年冬京師無冰

英宗治平二年十月乙巳雨木冰

神宗熙寧三年十月八年正月京師雨木冰

哲宗元祐八年二月京師大寒霰雪雨木冰

欽宗靖康元年十月乙卯雨木冰 二年正月丁酉

雨木冰

孝宗乾道三年冬溫少雪無冰